

UKA2017-31
6. Nov 2017
Michael Rosing
Attaviitsoq

**Apeqquteqaat aallaavigalugu Inatsisartut oqallinnissaannik siunnersuut, una pillugu:
Nunatta napparsimaviini katsorsaasoqarnikkut maannakkut siunissamilu amerlassutsitigut
ikinnerpaaffiliisimanerput qanoq iliorluta naammassineqarnissaa qulakkeersimassavarput.**
(Inatsisartunut ilaasortaq Jens-Erik Kirkegaard, Siumut)

Nunami maani nakorsanik amingaateqarpugut. Tamanna qularutissaanngilaq. Aamma perorsaasunik, ilinniartitsisunik, maskinmesternik allarpassuarnillu ilinniarsimasunik amingaateqarpugut. Soorunami ajornartorsiut qaangerniarlugu ilaatigut ilinniartitsisinnaavugut. Kisianni sivissusaq, siviisoorujussuusaq. Taava tungaanut qanoq iliussaagut?

Aallarniutigalugu qivialaariartigu Kalaallit Nunaannut suliarortartut qanoq pissuseqarfigisarnerlugit. Taamaalioreeruttalu taava qiviariartigu kalaallit ilinniarluarsimasut suliarortlutik nunatsinnut uteraangata qanoq pisarnerlutigit. Naatsumik oqaatigalugu oqarfigisarpagut sulisikkumallutigit kisiannili tikilluaqqusaavallaanngitsut.

Siullermik piffissaq ingerlareesimaleraangat kikkut tamat oqartussaaqataanerannut aatsaat akuutilertarpagut. Ukiup affaa mattusimaqqaartarpagut. Pivakka tikisitat kiisalu kalaallit uternikut ilinniarnerminni allami najugaqqaartariaqartartut. Maannakkullu eqqartorneqalerpoq ukiut marluk arfineq-marlullu akornanni qinersisinnaatitaassanngitsut. Tamatuma ersareriaqqiffissaqanngitsumik takutippaa inuiaqatigiinni peqataatikkusunngikkigit.

Alla uanga nammineq qinngariuagara tassaavoq aamma aallaaniarnikkut killilersuisoqartarnera. Perruualaarutigisarparput aallaaniartuunerput kisianni assersuutigalugu aavarsinnaatitaasarput aatsaat ukiut marluk maani najugaqareersimasut. Apeqqutaatinneqarneq ajorpoq tikerlaat nunani allani ukiorpassuarni piniarsinnaanermut allagartaqarsimanersut aamma maani silaannarmiinneq periarfissatta ilaagaat nunarsuup sinnerani pineqarsinnaanngitsoq. Akeqanngilaq kisianni soormitaavaana nuuttut taama killilersuiffiginiartuassavagut.

Alla eqqarsaatigisariaqagarput tassaavoq nunatsinnut nuuttut amerlanersaat tassaammata danskit ilinniagartuut aamma kalaalerpassuit ilinniareerlutik uteqqissinnaasut tassaapput ikinnerussuteqartut danskisut oqaasillit imaluunniit danskimik aappallit imaluunniit danskisut oqaasilinnik qitornallit. Taakku qitornaat atuarfinni marluinnik oqaaseqarfiusuni atualertarput. Ajunngilaq ilikkagaqarluartoqartarpat avatangiisini marluinnik oqaaseqarfiusuni. Kisianni meeqqat ukioq sinnerlugu maani najugaqarsimagunik taava kalaallit oqaasii ilitsoqqussatut oqaaserisutut naggataarutaasumik soraarummeertoqartariaqartarpoq.

Ukiut sisamat missaasa ingerlanerani kalaallit oqaasii ilinniarneqarsinnaapput atuartinneqarnissamut tutsuviginartumik neqerooruteqanngippat atorsinnaasumik. Maannakkuugallartoq taamaattoqanngilaq, iluatsikkiartuaarporli. Nuuttut amerlanersaasa ukiut pingasut sinninngisaannarpaat. Taava soormitaavaana piumasariuaripput kikkut tamarmik kalaallisut ilinniartariaqartut. Amerlanerparpaanut asuli piffissaajaataassaaq, piffissaq nakorsat isaannit isigalugu atorusunnarneruvoq nakorsianik katsorsaanermtut.

Ullumikkutut inuiaqatigiit atungartuut piginnassagutsigit taava avataaneersut sulisussatut pinngitsoorsinnaanngilagut. Tassa sulisussat pisariaqartitagit ajornannginnerpaamik piginnarsinnaavagut oqaluttuullugit siviisunerusumik maaniittariaqartut. Aamma kalaallit aalajangersimasut nunani allani najugaqarniarlutik paasitittariaqarpagut angerlartariaqartut.

Tamannalu aatsaat pisinnaavoq tamakku tikilluaqqusaasutut misigisimalersinnerisigut. Pissutsit maannakut tikkuakkakka suunngitsutut isigineqarsinnaapput, immaqami aamma taamaappoq ataasiakkaarlugit qiviaraanni. Kisianni ataatsimoortikkaanni takuneqarsinnaavoq sulisussat avataaneersut iluarinngikkaluarutsigilluunniit pinngitsoorsinnaanngikkigut, taamaakkaluartorli tikilluaqqusaavallaanngillat. Tamannalu allanngortittariaqarparput.

Qujanaq oqallinnermut nuannersumut.